

**«ՀԱՅԱՍՏԱՆԻ ՖԻԶԻԿԱԿԱՆ ԿՈՒԼՏՈՒՐԱՅԻ ԵՎ ՍՊՈՐՏԻ ՊԵՏԱԿԱՆ ԻՆՍՏԻՏՈՒՏ»  
ՀԻՄՆԱԴՐԱՄԻ ՔՈԼԵՋԻ ՆԱԽՆԱԿԱՆ ՄԱՍՆԱԳԻՏԱԿԱՆ (ԱՐՀԵՍՏԱԳՈՐԾԱԿԱՆ)  
ԸՆԴՈՒՆԵԼՈՒԹՅԱՆ, ՓՈԽԱԴՐՄԱՆ, ՏԵՂԱՓՈԽՄԱՆ ԵՎ ԱՎԱՐՏԱԿԱՆ ԱՄՓՈՓԻՉ  
ԱՏԵՍԱՎՈՐՄԱՆ ԿԱՆՈՆԱԿԱՐԳ**

**I. ԸՆԴՀԱՆՈՒՐ ԴՐՈՒՅԹՆԵՐ**

1. «Հայաստանի ֆիզիկական կուլտուրայի և սպորտի պետական ինստիտուտ» հիմնադրամի (այսուհետ՝ Հիմնադրամ) հենակետային քոլեջի (այսուհետ՝ քոլեջ) նախնական մասնագիտական (արհեստագործական) կրթություն ստանալու համար սովորողների ընդունելության, փոխադրման, տեղափոխման ավարտական ամփոփիչ ատեստավորման քննությունների կանոնակարգը (այսուհետ՝ Կանոնակարգ) մշակված է Հայաստանի Հանրապետության Սահմանադրության, «Կրթության մասին», «Նախնական մասնագիտական (արհեստագործական) և միջին մասնագիտական կրթության մասին», «Հիմնադրամների մասին» Հայաստանի Հանրապետության օրենքների, Հայաստանի Հանրապետության կրթության և գիտության նախարարի 2006 թվականի հուլիսի 21-ի թիվ 638-Ն, 2012 թվականի ապրիլի 5-ի թիվ 254-Ն, 2010 թվականի հոկտեմբերի 01-ի թիվ 1455-Ն հրամանների, այլ իրավական ակտերի և Հիմնադրամի կանոնադրության հիման վրա:
2. Սույն կանոնակարգը կարգավորում է ՀՖԿՍՊԻ-ի հենակետային քոլեջի նախնական մասնագիտական (արհեստագործական) կրթություն ստանալու համար սովորողների ընդունելության փոխատեղման տեղափոխման եվ ավարտական ամփոփիչ ատեստավորման գործընթացները:

## II. ՔՈԼԵՋԻ ԸՆԴՈՒՆԵԼՈՒԹՅՈՒՆԸ ԵՎ ՀԱՆՁՆԱԺՈՂՈՎՆԵՐԸ

### 1. Քոլեջի ընդունելությունը

- 1) Քոլեջում նախնական մասնագիտական (արհեստագործական) սովորողների ընդունելությունը կատարվում է Հայաստանի Հանրապետության կրթության պետական կառավարման լիազոր մարմնի սահմանված կարգով հաստատված մասնագիտությունների ցանկին համապատասխան՝ մատչելիության, վստահության, թափանցիկության, հավասարության սկզբունքների կիրառմամբ:
- 2) Հայաստանի Հանրապետության երկքաղաքացիները քոլեջում նախնական մասնագիտական (արհեստագործական) կրթություն ստանալու համար ընդունվում են Հայաստանի Հանրապետության քաղաքացիների և օտարերկրացիների համար Հայաստանի Հանրապետության կառավարության սահմանած պայմաններով՝ իրենց ընտրությամբ:
- 3) Օտարերկրացիները՝ իրենց ընտրությամբ քոլեջ նախնական մասնագիտական (արհեստագործական) կրթություն ստանալու համար կարող են ընդունվել միայն վճարովի հիմունքներով կամ ՀՀ կառավարության կողմից սահմանված կարգով:
- 4) Քոլեջի նախնական մասնագիտական (արհեստագործական) կրթություն ստանալու համար սովորողների ընդունելությունը անցկացվում է մրցութային հիմունքներով՝ առնվազն հիմնական ընդհանուր կրթություն ունեցող անձանց դիմումների հիման վրա:
- 5) Սովորողների հետ կնքվում է կրթական ծառայությունների մատուցման պայմանագիր:
- 6) Արգելվում է նախնական մասնագիտական (արհեստագործական) հաստատությունների վճարովի համակարգում սովորող, ուսումնառող՝ Լեռնային Ղարաբաղի Հանրապետության և Վրաստանի Սամցխե-Ջավախք ու Քվեմո-Քարթլի նահանգներում գրանցված և բնակվող հայազգի քաղաքացիների նկատմամբ կիրառել ուսման վարձավճարի ավելի բարձր չափ, քան սահմանված է տվյալ ուսումնական հաստատության համանման պայմաններում սովորող Հայաստանի Հանրապետության քաղաքացիների նկատմամբ:
- 7) Հաստատությունն ընդունելությունն իրականացնում է պետական կառավարման լիազորված մարմնի (այսուհետ՝ Լիազորված մարմին) կողմից տվյալ ուսումնական տարվա համար հատկացված՝ առկա (ստացիոնար) ուսուցմամբ անվճար և վճարովի տեղերին համապատասխան:
- 8) Ընդունելության գործընթացը կազմակերպելու նպատակով՝ Լիազորված մարմնի կողմից առկա (ստացիոնար) կամ հեռակա ընդունելության տեղերը հատկացվելուց հետո՝ 5 օրվա ընթացքում Քոլեջի տնօրենի (ռեկտորի) հրամանով ստեղծվում է ընդունող հանձնաժողով և ընդունելության գործընթացը սպասարկող տեխնիկական անձնակազմ:

- 9) Ընդունելության մրցույթն անց է կացվում ըստ մասնագիտությունների՝ կրթության կառավարման տեղեկատվական համակարգում գրանցված դիմորդների հայտերի հիման վրա:
- 10) Մրցույթով անցած յուրաքանչյուր դիմորդի համար կազմվում է անձնական գործ, որտեղ ընդգրկվում են ՀՀ կրթության և գիտության նախարարի 2012 թվականի ապրիլի 5-ի թիվ 254-Ն հրամանի հավելվածով սահմանված կարգի 19-րդ կետի 3-10-ը ենթակետերով նախատեսված փաստաթղթերը կամ փաստաթղթերի պատճենները:

### **III. ՍՈՎՈՐՈՂՆԵՐԻ ՓՈԽԱԴՐՈՒՄԸ**

- 11) Սովորողները իրավունք ունեն վճարովի ուսուցման համակարգից փոխադրվելու անվճար ուսուցման համակարգ.
- 12) Ուսման վճարի փոխհատուցում նպաստի ձևով տրվում է մրցույթի արդյունքներով արհեստագործական և միջին մասնագիտական ուսումնական հաստատություն ընդունված, ուսումնական տարվա արդյունքներով բարձր առաջադիմություն ունեցող, սոցիալապես անապահով, ինչպես նաև սահմանամերձ և բարձրլեռնային բնակավայրերի ուսանողներին՝ Հայաստանի Հանրապետության օրենքներով սահմանված կարգով, Հայաստանի Հանրապետության կառավարության հաստատած տեղերի քանակին և կարգին համապատասխան:
- 13) Սովորողների փոխադրումը իրականացվում է սովորողների գիտելիքների գնահատման և անցկացման կանոններին համապատասխան:

### **IV. ՍՈՎՈՐՈՂՆԵՐԻ ՏԵՂԱՓՈԽՈՒՄ**

- 14) Սովորողի տեղափոխումը մեկ ուսումնական հաստատությունից մեկ այլ ուսումնական հաստատություն (այսուհետ՝ տեղափոխում) կատարվում է երկու ուսումնական հաստատությունների տնօրենների համաձայնությամբ:
- 15) Սովորողի տեղափոխումն առաջին կիսամյակում չի թույլատրվում:
- 16) հեռակա ուսուցման բաժնից առկա ուսուցման բաժին և առկա ուսուցման բաժնից հեռակա ուսուցման բաժին հիմնական կրթության հիմքով ընդունված Սովորողի տեղափոխումը թույլատրվում է չորրորդ կիսամյակն ավարտելուց հետո, եթե տվյալ կրթական ծրագրի իրականացման ժամկետները համապատասխանում են:
- 17) Սովորողը տեղափոխման մասին դիմում է ներկայացնում ուսումնական հաստատության տնօրենին՝ նրա գրավոր համաձայնությունը ստանալու համար:
- 18) Տեղափոխման մասին Սովորողից դիմումն ընդունվում է ուսումնական կիսամյակը սկսելուն նախորդող և հաջորդող երկու շաբաթների ընթացքում:
- 19) Տնօրենը եռօրյա ժամկետում գրավոր պատասխանում է Սովորողին՝ կցելով ակադեմիական տեղեկանքը կամ մերժման դեպքում՝ դրա փաստարկված հիմնավորումները:

- 20) Անվճար ուսուցման համակարգում ուսումնառած Սովորողի տեղափոխման դեպքում կրթությունը կազմակերպվում է վճարովի հիմունքներով, բացառությամբ Հայաստանի Հանրապետության օրենսդրությամբ սահմանված դեպքերում արտոնություն ունեցող Սովորողների, որոնց կրթությունը շարունակվում է անվճար հիմունքներով: Տեղափոխված Սովորողը հետագա ուսումնառության տարիներին կարող է օգտվել նպաստի ձևով ուսման վճարի փոխհատուցման իրավունքից:
- 21) Օտարերկրյա ուսումնական հաստատությունից Սովորողի տեղափոխումն իրականացվում է նախարարության թույլտվությամբ և հրամանագրվում է միայն վճարովի ուսուցման համակարգում:
- 22) Ընդունող ուսումնական հաստատությունում կազմվում է Սովորողի նոր անձնական գործ, որում ընդգրկվում են Սովորողի կրթության մասին վկայող փաստաթուղթը, ակադեմիական տեղեկանքը, ընդունման հրամանի պատճենը և Սովորողի հետ կնքած պայմանագիրը: Սովորողին տրվում է նոր ուսանողական տոմս և նրա հետ կնքած պայմանագրի 2-րդ օրինակը:
- 23) Ունկնդրի տեղափոխումը կարգավորվում է ունկնդրի և քոլեջի միջև կնքված պայմանագրով:

## **V. ԱՎԱՐՏԱԿԱՆ ԱՄՓՈՓՈՒՉ ԱՏԵՍԱՎՈՐՈՒՄ**

- 24) Քոլեջում նախնական մասնագիտական (արհեստագործական) կրթություն ստացած շրջանավարտների պետական ամփոփիչ ստուգումը կարող է անցկացվել հետևյալ ձևերով.
- 25) Պետական քննություն մասնագիտական առանձին առարկայից,
- 26) Պետական քննություն մասնագիտական մի քանի առարկաներից (միջառարկայական քննություն),
- 27) Դիպլոմային նախագիծ,
- 28) Դիպլոմային աշխատանք,
- 29) Առանձին առարկայից պետական քննությունն անց է կացվում հարցատոմսերով, որոնք ներառում են տվյալ առարկայի հիմնական բովանդակությանը համապատասխան հարցեր,
- 30) Պետական միջառարկայական քննությունն անց է կացվում հարցատոմսերով: Այդ հարցատոմսերը ներառում են առանձին մասնագիտական առարկաների հիմնական բովանդակությանը համապատասխան հարցեր, որոնք բխում են տվյալ մասնագիտության պետական կրթական չափորոշչով սահմանված շրջանավարտի որակավորման բնութագրից,
- 31) Պետական քննությունները կարող են անցկացվել բանավոր, գրավոր, թեստային, գործնական աշխատանքների, իրավիճակային խնդիրների դրանց համակցված և այլ ձևերով,

- 32) Դիպլոմային նախագիծը կամ դիպլոմային աշխատանքը կոչված է համակարգելու և ամրապնդելու շրջանավարտների գիտելիքներն ու կարողությունները և, որպես կանոն, պետք է ունենա գործնական նշանակություն՝ մասնագիտությունից որոշակի խնդիր(ներ) լուծելու առումով:
- 33) Դիպլոմային նախագծի (աշխատանքի) թեմաները սահմանվում են մասնագիտական ուսումնական հաստատության կողմից՝ հաշվի առնելով աշխատաշուկայի պահանջները կամ նրա զարգացման միտումները: Դիպլոմային նախագծի (աշխատանքի) նախապատրաստման ընթացքում ուսումնական հաստատության տնօրենի հրամանով յուրաքանչյուր շրջանավարտին կցվում է ղեկավար(ներ), իսկ անհրաժեշտության դեպքում՝ նաև խորհրդատու(ներ):
- 34) Դիպլոմային նախագիծը (աշխատանքը) ենթակա է գրախոսման:

## VI. ԵԶՐԱՓՈՒԿ ԴՐՈՒՅԹՆԵՐ

- 35) Սույն կանոնակարգն ուժի մեջ է մտնում 2022թվականի մարտի 10-ից:
- 36) Սույն կանոնակարգի փոփոխությունները և լրացումները կատարվում են ՀՖԿՍՊԻ-ի Գիտական խորհրդի կողմից:
- 37) Սույն կանոնակարգով չկարգավորված հարաբերությունները կարգավորվում են Հայաստանի Հանրապետության օրենսդրությամբ: